



Орган Лемковского Союза.

Выходит в каждый четверг.

Редакция и администрация в Крынице. — Адрес „Лемко“ Крыница.

Всіх читателів, котрі не ввели ще пренумерати, просимо вирівняти якнайскорше рахунки.

Пренумерация:

30 грошей місячно,

80 „ квартално

1.50 „ полпрочно,

3 зл. рочно.

В Америкі: 1 дол. рочно.

В Чехословаччині:

2 кор. місячно, 10 кор. полпрочно,

20 кор. рочно.

Ціни оголошень:

Ціла сторона 120 зл., $\frac{1}{2}$ сто-

роны 60 зл., $\frac{1}{4}$ стороны 35 зл.,

$\frac{1}{8}$ стор. 20 зл., $\frac{1}{16}$ стор. 10 зл.;

оголошення малы за 1 мм. 20 гр.,

в тексті 30 гр., перед текстом

40 гр. При місячному и довшом

оголошеню значна знижка.

Конто чекове Нр. 404.155.

По Талергофском святі в Поворознику.

Небывалый рух на дорогах, ведучих до Поворозника. Хоч то неділя,—переїзджають возы оден за другима. На возах хлопцы и жены. Крім того видно ту и там громадки молодежи, котра, уставлена в пары, машерує весело и співають пісні. Всі они — старцы и молодцы, мужины и женщины співають на народне свято, на Талергофске Торжество, яке має отпраздновати ся в Поворознику.

Там коло читальні ім. М. Качковского лежить уж трираменный крест. Берут его на плечи почтенны талергофцы и несут на кладбище. Перед крестом иде талергофец-патриот Почетный Крылошанин О. Евгений Хилляк, парох из Крыницы в товаристві місцевого пароха О. Ваха. Поход двигат ся поважно вперед. Тылицкий духовый оркестр грає жалобны марши. В перервах мішаний хор с Андреевки и Поворозника співають: „Со святыми упокой...“ и „Святы Боже“ и поход входит торжественно на кладбище.

По уставленю посвячено крест и отслужено панихиду за душами мучеников світової війны. По панихиді выголосил М. Трохановский с Крыницы коротку бесіду посвячену памяти погыбших страдальцов и поход рушил с поворотом на площу перед домом читальні, где на поднесеном місци была прибита памяткава таблица, в котру талергофцы и их родины вбили гвозді творячи с них напис: „За Русь в Талергофі в р. 1914—1917“. Там выголосили бесіды Д-р Орест Гнатышак, Д-р Александер Хилляк и многы селяне. Дівчатка со Щавника отдеклямовали ряд прекрасных вершков.

Меже бесідами співав мішаний хор с Андреевки, вышколений добре через Исидора Яценюка и мішаний хор с Поворозника под руководством Пирога.

По вбитю гвоздей в памяткува таблицу,

внесено ю торжественно до салі читальні ім. М. Качковского в Поворознику и поміщено на стіні, где буде она находити поколіням муки их предков и учить их, як належит любити свой родной язык и край.

На том окончено торжество, котре от початку до конца перешло в атмосфері поважной и не было заколочено жадным скрежетом.

Мимо волі приходит на мысль таке само свято, отпраздноване перед 3-ма літами в Злочком. Так тепер, як и втотчас собрал ся народ не по того, чтобы кого зневажати, або ширити злобу и ненависть, лем по того, чтобы отдати мученикам народа належну честь и преклонити свои головы перед их муками, а также помолити ся за их души. Але втотчас гдєкотры священники-украинофилы, заохочены до того их церковными властями выше ставили политичны взгляды от религиозных обовязков. Они для политичных цілей с легким сердцем потрафили отказати в посвяченю креста и в отслуженю панахиды, а коли народ хотіл поставити крест на кладбищі, чтобы под нем могли помолити ся вдовы и сироты по тых народных мучениках, котры свои кости положили под соснами в далекой Стырии, они не повдержали ся выкликати авантуру и битку.

Тепер, славити Бога, тоты часы сут за нами, бо утворено для Лемковщины отділну Администрацію, котрой высокодостойны Руководителі, вірны своим архипастырским обовязкам, не забывают николи о том, же их першим и святым долгом єст служити Богу и ширити и подносити моральный уровень народа. Видячи таке поведєне владык священники также перестают уживати проповідальницю за місце политичной пропаганды и поволі Лемковщина припомне нам тоты добры часы, коли меже священником и народом были патріархаль-

ны отношения и коли на цілої Лемковщині не было ниякой распри, а пановала всеціло згода и братска любов.

Затісненє приязни меже Польщом и Франциом.

Дня 12. т. м. приїхал до Польщи заступник председателя Верховной Воезной Рады Франции геи. М. Густав Гамелин. Генерал Гамелин іхал до Польщи через Швайцарию, Австрию и Чехословакию. Побит его в Польщі має тревати 5 дней. Генерал Гамелин гостил в часі побита в Польщі у Начального Вождя Оружных сил ген. див. Рыдз Смиглого.

До той визиты привязуют политичны круги велику вагу. Єст она заперечєм, всіх вістей о том, же навязанє польско-німецких отношений убило польско-французску приязнь. Приязнь тоту хоче затіснити встріча верховных вождов обох армий. Новы вооружєня Німеччины примушають Польшу и Францию зревидовати положєне своего вооружєня в условиях, котры николи може не были так непевны, як тепер.

Страшне жниво испанской революции.

Продолжаючи ся домашна война в Испании переходит своим жестокостю всю, што діяло ся до того часу в часі ріжних переворотов и револът. Обі стороны не знають пощады для своих политичных противников.

В Барцельоні в минувшом тыждні сорганізовано чотыры полкы народной милиции. Ціла власть перешла в руки роботничо жолнірских рад, котры переводят масовы екзекуции. В одном тыждні розстріляно там понад 300 людей, котрых подозревали в сымпатии для повстанцов.

Повстанцы относят побіду над правительственными войсками. Положєне правитель-

ственных войск есть барз трудне и здає ся, же повстанцам посчастит ся заняти столицу Испании Мадрид, котру окружают повстанцы от полудня и полночного заанада.

Вожд повстанцев ген. Франко заявил корреспонденту Райтера, же в случаю его победы в Испании запровадит ся ряды кор-

порацийной системы, так, як в Португалии, Италии и Німеччині. Армия отгрыват ролю хирурга, котрый желеє спасти жите Испании.

Диктатура войскова в Испании буде тревати так долго, як долго зайде того потреба.

ПЕРЕНАСЕЛЕНЕ ПОЛЬЩИ.

В „Газеті Польской“ и других варшавских газетах появил ся цікавый артыкул о перенаселені Польщи и о видах устраниения того перенаселения на меженародной платформі.

Артыкул тот єст так знаменный, же вартат ся с ним познакомити и тому подаєме его в скороченію.

На судьбу каждой державы маюť вплине передовсем два факторы. Перший фактор, то само населені державы, другим єст маєток, котрый тот населені має до распорядимости. Оба тоты факторы значат дуже, так во внутреннем розвиті державы, як и во взаимных меженародных отношениях.

Хоць тепер в штоденном житію народов высунули ся на передове місце господарчи маєткы, их выміна, меже народами и звязаны с тым торговельны договоры и т. п., але в послідных часах начинат ставати ся грозным также другой фактор, а именно само населені, котрого єст в гдекотрых місцах рішительно за дуже, што выкликує всенародный непокой и став ся часто причиною войны.

Перенаселені Италии выкликало войну италянско-абисынску. Перенаселені Японии выкликує безпрерывны опасности на Далеком Востокі. Так само жидовска справа довела в Палестині до забурения. Єст она не лем справом религийном и национальном, але передовсем справом населения. Именно, як нпр. в Польщі, существует перенаселені жидовске в одной галузи господарчого житя — в торговлі.

Сут державы, котры не маюť клопоту с перенаселеніем, бо у них его нїт, — сут другы, где перенаселені и справы с ним звязаны выступаюť остро. До тых других держав належит Польша.

Польша под взглядом населения и пространства занимает шесте місце в Европѣ, але под взглядом прироста населения стоит она на четвертом місци в цілом світі. С посеред великих держав выпереджат Польшу под тым взглядом лем Япония. Польщі прибыват каждого року 400 тысяч голов. Польша росне и пучніє. Тымчасом тому розростови не отвѣчают достаточны господарчи маєткы. Тых має Польша за мало.

Тото не позвалять употребити тот величезный резервуар человеческих сил. Польша не має тилько капиталов, килько потребує и не може свободно распоряджати ся суровыма материялами, потребныма до развития промысла в краю. Утрудняť тото житє и удержаніє населения.

Великий прирост населения и перенаселені змушат Польшу, штобы звернула особенну увагу на эмиграцию с краю. Так перенаселені села, як и перенаселені в торговлі може усунути ся лем через эмиграцию. Эмиграция буде возможна, если для эмигрантов с Польщи открывот ся нена-

селены пространства заморскы, лежащи отлогом, дикы.

Эмиграция wymagať згодного сотрудничества краю, маючого надмір населения с краями маючими надмір несужитой землі.

В Полудневой Америкѣ сут величезны пространства, где не было ище человека, хотяого там поселити ся. Полуднево-американскы правительства не раз уж заявляли, же брукѣ им рабочих рук до сужиткования тых ненаселеных пространств. Также и в Африкѣ розлагаюť ся величезны пространства, совсем невыкористаны через человека и надаючи ся до населения европейцами. Насуваť ся адже проста розвязка. Тоты котры маюť надмір населения, повинны порозуміти ся с тьма, котры маюť надмір землі. Але само такое порозумлені не выстарчат.

Кромѣ згодного порозумленія ся обох сторон, потреба доконче до розвязки sprawy ище одной річи — капитала. Без поважных оборотовых средств не можна сорганизовати великого эмиграционного руху. Але капиталов на світі не бракує. Низкий процент, який тепер бере ся по великих банках світовых, свидчат о том, же капиталы сут и ждуть на сужиткованіє.

Тож если сут капиталы, дальше если одны край сут перенаселены, а другы маюť надмір землі, то што-ж остає ся? Нич друге, лем порозуміти ся и пустити тото все в рух, штобы перенаселені уступило. Если лем край со свободными пространствами и край банкерскы будут мати добрую волю, то справа даст ся легко перевести. Справом том повинна ся заняти Лига Народов. Она в першой мірі єст до того покликана, бо она дознала того на самой собі и переконала ся, які опасности грозят от перенаселения и браку работы для миллионов. Упомянуты выше два перенаселены край забрали ся сами до урегулирования тых справ. Не видячи другого выхода, шмарили ся до войны. Япония с того повода выступила с Лиги Народов, а Италия ввошла с нѣм в конфликт. В результаті ослабило тото повагу Лиги. Если Лига бажат не допустити до дальших конфликтов того рода, повинна забрати ся до урегулирования перенаселения народов.

Меженародна Комисия Труда в Женевѣ, ділаючи при Лигѣ Народов, приготовила уж внесеніє, штобы вынайти отвѣтны терены для эмиграции немецкой. Рада Лиги на найближшом засіданію буде мусіти так ци иначе заняти ся тьма справами. Як чути при той случайности и Польша также жаждат для своих эмигрантов открытия теренов слабо населеных и облегченіє эмиграционных.

ПО ЛЕМКОВЩИНѢ.

О Т О З В А

до гр. кат. церковных півцов Лемковщины.

Организационный комитет гр. кат. церковных півцов Лемковщины, завязанный в Змигороді дня 30. серпня 1935. внес прошеніє до Апостольской Администрации Лемковщины о выданіє зарядженія в користь церковных півцов.

Зарядженіє таке выдано в Вістях Апостольской Администрации Лемковщины Ч. 28. за грудень 1935 р. под поз. 2618, але оно не заспокаят наших житєвых потреб и тому просит ся и завзыват всіх гр. кат. церковных півцов Лемковщины, штобы конечно в каждом деканатѣ собрали ся в день 31 серпня 1936 в назначеном місци и основали деканальный организационный комитет, а также выбрали 2—3-ох делегатов на с'їзд, котрый отбуде ся дня 1 вересня (нового церковного року) в Рымановѣ. Делегаты маюť взяти с собою полномочіє, подписане всіма присутными.

До переведения организации в поодиночных деканатах и скликанія деканальных собраний покликѣ ся слѣдующих церковных півцов:

1) Деканат буковский: Дм. Гриневич в Сенковой Волѣ и Михаил Петрак в Пулавах.

2) деканат горлицкий: Михаил Ференц — Высова, Ан. Астряб — Маластов, Дионисий Дытко — Новица.

3) деканат грибовский: Володмир Дуць — Королева Руска, Антон Москва — Снітница.

4) деканат дыновский: Василь Лемеха — Бахор, Афтанас — Павликома, Василь Сухой — Добра Шляхотска.

5) деканат дуклянский: Даниил Костяк — Галбов, Василь Кобеляк — Крамна.

6) деканат короснянский: Войтїх Мрозек — Ванька, Петро Пащак — Бонаровка.

7) деканат мушинский: Павло Греняк — Крыница, Иван Кошла — Тылич, Алексий Пырог — Поворозник.

8) деканат рымановский: П. Сеньо — Завадка Рым., Ник. Куземка — Синява, Ник. Вдовин — Суровица.

9) деканат сяноцкий: Иван Страмик — Замуже, М. Воробель — Одрехова.

О деканальном собранію треба повѣдомити Деканальный Уряд и Староство. По собранію треба написати два отписы протоколов (один отослати Апост. Администрации, другой комитетови с поданієм назвиск выбранных делегатов. Перед собранієм получат дякы информации. На деканальных собраниях треба собрати даткы на покритіє коштов с'їзда.

Так г. г. церковны півцы, если хочемо штоси для себе придбати, мусиме не жалити ани труда, ани грошей.

От организационного комитета гр. кат. церковных півцов Лемковщины:

Предсідатель:
Михаил Фецина
п. Змигород

Секретар:
Даниил Костяк

Стефан Роздільский
дяк с Перегримкы.

Крещенє русина на украинца в Боську.

Недавно О. Величко попросил до себе О. Кузика из Радомна, бывшего пароха в Боську. В день приїзда о Кузика собрали ся людє коло церкви, штобы привитати ся с о. Кузиком, котрый в часі своєї душпастырской работы в селі не вел никакой политики и тым заслужил собі честь и повагу у селян. О. Кузик привитал ся с парохиянами, а узрівши меже нима старенького Дідича, честного господара и патриота-талергофца, котрый помимо пережитых мук єст дальше твердым русином, дорожачим своим руским именем, приступил до него и по привитаню начал с ним розмовяти. В розмову вмішал ся о. Величко, котрый сказал, што старый Дідич, то порядный и честный человек, але має оден великий блуд, бо не єст украинцом, лем русином.

— Може бы отче — каже о. Величко до своего гостя — перекрестити єго ту коло церкви на украинца.

— Проба не зашкодит — каже о. Кузик — начинайме!

Бере о. Кузик в обі руки замашистый ус Дідича и начинат крутити, кажучи: раз, тепер — два, а як скажу — три! стане ся чудесо. Сказал — три и пытат ся:

— но як? ци уж украинец?

— Ніт отче! сказал твердо старец, яким я был, таким и остану ся до смерти! Помимо огорченя, што так насмівають ся ігомости над старцом, не сказал он нич больше, шануючи святе місце и церковь, коло котрой насмівали ся над ним украинскы священники и робили комедию. Всі собрани коло церкви были обурены таким непошанованєм святого місца и поступками надаючими ся до шинку у Лібы, а не коло церкви.

Не дивуєме ся о. Величці бо тот любит фіглї и мы привыкли уж не до одного. На проповідях называт людей идиотами и довел в парохии до открытой борбы. В праці ширеня ненависти не устає и певно вірит, же за тоє остане атаманом незродженой через маму німку Украины (тяжкий пород отцы, зам. складача). Дивуєме ся лем вам Отче Кузик, што вы, яко старенький выберате ся с мисиом навертати рускых на украинцов и крутити усы парохиянам при церкви. Шануйте свой старый вік, бо мы вас мимо ваших переконань шануєме и хочеме вірити, же не всі украинскы священники такы ряны, як о. Величко, котрого работа знана нам добре, помими, што он у нас єст коротко. Он роспутал у нас борбу, якої наше село не проживало за жадного священника. За него украинцы нападають на людей и хаты и о том знає уж суд и полиция. Для о. Величкы нич не значат приказы єго властей, бо помимо заказу он на соборчик удекоровал церковь украинскыма флягами.

Не обряд вам о. Величко, а политика на думці! Не любов Христа, а любов тых, котры зовут себе украинцами.

Мы русины, мужики переживєме и украинский терор так, як передержали мы тюрьмы и страданя, а Галицка Русь дожде ся ліпшой долі.

Сусід.

Посланє о. Величкы до вірих и честных украинцов, парохиян в Боську.

„Дороженькы! Минули для вас добры часы и тепер мусите бідовати и привыкнути до планшого. За добре поводило ся вам селянам перше и для того тепер нарикаєте, што вам зле. Може так не поводит ся вам тепер, як давнійше, бо пригадуєте собі, як хлоп мал полно грошей и жил собі як великий пан. Бывало дороженькы у вас так, што пероги в маслі плескали и вы мачали их так, што на усах оставало и по бороді текло ся масло, (што могли собаки лизати). Так, так бывало! Добре бывало, як то в місті ставило ся чвертинкы горілки и с'їдало ся мисочки студенины и кромі того везло ся и до хаты. Добры то были часы, аж жаль за нима”.

Таку промову голосит о. Величко. Позабыл уж цілковито, же то церковь. Здавало ся єму, што говорит он до козаков, яко их кошевый. Здавало ся єму, што то не масло, ани солонина, але тече ся піна по усах ряных запорожцов.

Дальше говорит, што Бог скарає парохиян за то, што они не будуют ігомосцьови плебании. Тепер отче крызыс и біда, тяжкы часы и не пора на палаты для вас. Продайте 20 моргов землі, бо маєте за много. Маєте около 4000 зл. доходу, то можете ставити палаты, а не примушати до того бідных людей, котры не мають гроша, бо маєте добру хату. Лучше поправити церковь и помальовати, як ставити палату. Маєте килькох, котрых гостите у себе и они робят крик о будову. Богом за то никого не карайте, бо Бог не дітина.

Сусід.

ПОМІЩАЙТЕ
ОГОЛОШЕННЯ
В ГАЗЕТІ „ЛЕМКО”

Килько овец єст на світі.

Найбольше овец на світі єст в Австралии. Єст там 111 милионов штук овец. Росия має 79 милионов овец, Полночна Америка — 53 милионы, Державы Полудневой Африкы — 50 милионов, Аргентина — 44 милионы, Брытійскы Индии — 38 милионов, Нова Зеландия — 29 милионов, Велика Брытанія — 27 милионов, Испания — 20 милионов, а Польша — 3 милионы.

Звич. Обще Собранє

ЧЛЕНОВ О-ВА РУСКА БУРСА В ГОРЛИЦАХ

отбуде ся в четверг 27. серпня 1936

о год. 10 рано в помещенію бурсы
с слідуячом програмом дня:

1. открытє Общего Собрания и выбор презыдии,
2. отчитанє и принятє протокола послідн. Собр.
3. доклад о діяльности и касовый отчет,
4. доклад контрольной комиссии,
5. дискусия над докладами и уділенє абсолютории,
6. выборы нового правленя и контр. комиссии,
7. предложєня членов и
8. закрытє Общего Собрания.

Если в означеном часі не збере ся вымагана статутот число членов, то слідуяче обще собранє отбуде ся того самого дня с том самом програмом о год. 11-ой.

Особных повідомлень — не розсылат ся.

Правленє О-ва

ДЕРЖАВНЕ ЗАВЕДЕНЄ КУРАЦИЙНЕ В БЕСКИДІ ЗАПАДНОМ	
К Р И Н И Ц А — З Д Р О Й	
Доїзд СКОРЫМА ПОІЗДАМИ через Тарнов-Новый Санч ВАГОНЫ СЫПЯЛЬНЫ	
15 жерел щав желізисто-земельных, богатых в безводник угля. — Здрой Зубера, найсильнійша щав алькаличма Европы. (Польске Виши), купелі минеральны: квасо-углевы и боровиновы. КУПЕЛІ СОНЕЧНЫ. — Заведенє заосметрене в найновійши приряды лічничи.	
Пияльня и лазєнky, оґріваны в зимі центрально. Дом здровый :: поком с теплом водом.	
РЕСТАВРАЦИЯ, ДАНЦИНГ, ЧИТАЛЬНЯ, РАДИО	
Театр в сезоні головном, кино, спорты літны и зимушны. — Крыницкы воды лічат: хвороты сердца, жолудка, жолчи, печенкы, проводов мо- човых, женочи, малокровиє, нервы :: діють добре на переміну материи и т. д.	

Що чути в світі.

Париж: Водля послідних донесень число убитых в домашной войні в Испании выносит перешло 35.000, а раненых понад 100.000.

Лизбона: Послы заграничных держав в Мадрыті сут змушены опустити місто, бо положенє єст барз грозне. Если бы оказало ся невозможным выхати, то дыпльоматы наміряют просити свои правительства, штобы прислали им воздушною дорогою войска для обороны.

Париж: Если бы Франция дала помоч правительству испанскому, то Німеччина рішила дати помоч повстанцам. Начато уж переговоры с повстанцами, котры относятся до отступленя Німеччині кольянии в полночной Афыці, Рио-дель-Оро.

С Лизбона доносят, же на острові Мадера дошло до сильных уличных борб по поводу протеста населеня против подороженю провиантов. Килькадесят людей убито. Португальске правительство рішило выслати 2 кораблі с войском и ескадру самолетов.

Рим: Апостольска Столица має выступити с протестом в виду испанского правительства в Мадрыті против нищеня костелов и монастырей и против переслїдованя священников.

Париж: Ген. Франко перетранспортировал с Маррока до Испании 15.000 войска. Сподівають ся, же повстанцы ударят скоро на Малягу и Мадрыт.

Атены: Студенты университета в часі великой демонстрации антикоммунистичной спалили на улицах столицы книжки коммунистичного содержания.

Американске бюро патентов обходило 100-тну рочницу своего существования. Через тот час бюро выдало перешло 2 милионы патентов на вынаходы. Меже тума вынаходами єст много комичных. Так нпр. якыйсь вынаходчик опатентовал приряд, котрый припятий до хвоста куры мал стемпльовати яйце зараз по єго зложеню датом зложеня и именем куры. Інший опатентовал летучу машину, котру мали уносити в воздух запряжены до ней орлы.

Нью-Йорк: Цілый припас золота Сполученых Держав А. П., выносячий 10 миллиардов 600 миллионов долларов перевезено до нового в той ціли побудованого дому в форті Кнокс в державі Кентускы. Для перевоза той величезной массы золота ужи-то 60 панцерных поїздов.

Льондон: Португальске правительство звернуло ся до Англии с просьбом о опеку на случай, если бы испанскы коммунисты заатаковали Португалию або отнесли побіду в Испании.

Берлин: Німеччина формує отдільный полк балтийскый, до котрого будут приділяти балтийских німцов, жителей Поморя и біженцов с Росии, живущих в надбалтийских краях. Полк тот буде подлягати

безпосередно начальству балтийской флоты.

Гибралтар: В виду грозного положеня в Испании Англия, Франция, Німеччина и Италия сконцентрировали часть своей флоты на водах испанских.

Відень: Англицкый летчик Катард, котрый перед пару днями спровадил двоих испанских курєров на замок „Königswarth“ в Чехословакии до живучого там бывшего короля Испании Альфонса и котрому чesкы власти сконфисковали самолет, збіжал в дотепный способ с Чехословакии. Летчик пришол до гангару, где находил ся єго самолет и сказал, што сконфискованный самолет выдадут єму, в виду чого просит о зревидованє мотору.

Коли выведено самолет с гангару и на-полнено резервуар бензином в ціли переведеня контролі мотора, летчик скочил до самолету и отлетіл, махаючи чехам на пращанє хусточком.

Льондон: Англицкый политик Чурчиль пише в англицких газетах, же без взгляда на результат домашной войны в Испании послідства єй для Европы будут страшны. Фашистовска Испания ген. Франко в близкой приязни с Италиом и Німеччином былабы катастрофом. Неменьшом катастрофом была бы Испания коммунистична операючи ся на Франции.

Париж: Во Франции собрано дотепер милион франков на ціли помочи испанскому правительству. В Совітах собрано на тоту саму ціль 36 миллионов франков. Гроши тоты переслаю испанскому премьєрови.

Москва: Правительство в Росии рішило покликвати до военной службы молодеж от 19 року житя а не от 21-го. До року 1940 має быти покликана половина контингенту.

Місто, в котром живе 1000 собак и 4 людей. В полночных Индиях в місті Ляльш, положеной на дорозі меже Морабад и Аграр живе тепер лем 4-ох людей и 1000 собак. Псы кормит ся на кошт англика, котрого невіста умерла от затрутя мясом. Богатый тот англик кладе грубы гроши на удержанє

той місцевости, котра єст властиво містом собак, бо тых 4-о люда, то лем обслуга псов. Псы достают лем рослинный корм, бо англик хоче перекопати світ, же мясо єст для людей шкoдливe и же и псы могут обйти ся без него.

Папуга котра має 139 літ. В одной місцевости коло міста Сидней в Австралии живе папуга, котра має 139 літ. Голова уж совсем лыса, клюв барз долгый, бесідує уж мало, а найвекший клопот єст с комленєм, бо їст мало и с трудом. Зерна не може розгрызти и тому кормлят ю папком.

Вісти с краю.

С Катовиц доносят, же со Шлеска отлітают уж боцаны. Місцева населенє поясняет собі так вчасный отлет тых птахов вчасном и остром зимом.

Краков: Слїдство в справі Ванды Парылевич єст ведене с незвычайном енергиом. Прокураторскы власти стоят на становиску безвзглядного доходженя в ціли высвітленя sprawy. В послідних днях переведено ряд ревизий у людей занимающих высокы становиска.

В НЕДІЛЮ, ДНЯ 7. ВЕРЕСНЯ 1936.

о год. 2-гой по полудни

— уряджат —

читальня им. М. Качковского в Милику новосандецкого повіта

Талергофске свято,

на котре запрашат всіх тых, кому дорога память народных мучеников світовой войны.

Выділ Читальні.

КТО ХОЧЕ ЗАБЕЗПЕЧИТИ СЕБЕ НА СТАРОСТЬ И РОДИНУ

ОТНУЖДЫ И ГОЛОДА, АБО ЗЛОЖИТИ ДІТЯМ ВІНО,

НЕХАЙ ЯКНАЙСКОРШЕ

заасекурує ся

в асекурацийном Товаристві

ВИТА И КРАКОВСКЕ

во ЛЬВОВІ

Асекурацию принимают на цілой Лем-ковщині

представителі: гг. Осиф Яновицкый — Крыница-Село и Михаил Перелом — Сянок.